

Pedr'e sali

Arisèr'a notti a ore cena, hapu postu fogu a sa pinjada po coi duus macarronis e candu s'acqua hat incumentzau a buddiri mi seu ghettau una farrancada de sali a sa manu po cundizonai su manestu ma in mesu de sa manu mi seu agatau una bella pedr'e sali, prus mana de unu bidilioni. No nc'hiat'essi nisciuna meraviglia, arisèrus perou cussa pedra m'hat lassau a bucca obetta, e m'hat fattu torrai asegusu cun su regòrdu, finzas a candu in domu de babbu miu pedras de sali nd'arribanta medas e meda prus manas de cussa ki potau in sa manu; est stetiù cument'e ki po corant'annus mi ndi fessi scarèsciu de ddas essiri biasa, de nc'essi giogau e de m'essi spassiau a ddas scallai a corpus de matteddu po imperai su sali in coxina.

Mi seu seziù ind'una carida e mi seu regòrdau tottu. Mi seu regòrdau de candu babbu miu fiat su "salinèri", de candu andat a traballai cun sa bicicletta e de sa cooperativa ki hiat fattu po traballai. Mi seu regòrdau de su traballu ki hiat fattu sa bonanima e de is sacrificzius de tottu sa famiglia. Tottu su contu m'est torrau a conca e m'est benia gana de dd'isciri, finzas po porri lassai unu regòrdu a fillus mius.

A piccioccheddu babbu miu fiat biviù ind'una famiglia de messaius, non fiant poberus, ma ddis toccat a traballai sempri; sa mamma ddi fiat morta de maladia de coru candu issu teniat tres annus e at issu ddi fiat toccau a si spròbigau prus de is fraris, tant'est berus ca a scolla fiat andau pagu o nudda. Issu contat ca dh'hiant mandau a imparai a liggi e a iscriri, ma in s'ora giusta chi fiat studiendi is litteras de s'alfabetu, candu fiat arribau a "p" "q" (pi-cu) babbu suu ddi hiat nau ca fiat arribara s'ora de pigai su "piccu" e de andai a marrai.

Cun tantis sacrificzius fiat cresciu meda sentimentosu po is traballus e sa fatiga, e candu fiat andau militari hiat connotu is bideas comunistas e ddi fiant prascias meda. Dopo sa guerra, cun calanc'un'atru cumpangiu, hiant obetu in bidda sa sezioni de su partidu comunista; in cuss'ora is comunistas fiant castiaus mali prus de imoi, e su Papa ddus hiat finzas scuminigaus.

Babbu fiat disprasciu de custa cosa, ma non ci perdiat su sonnu. Prus e prus poita ca mancai fessit senz' e studius, fiat arrenèsciu, cun s'ajuru de sa Lega de is cooperativas comunistas, a cumponi in bidda una cooperativa de operaius pro traballai unius. Sa cooperativa hiat cumentzau cun pagus sozus, ma candu hiat fattu su cuntratu cun sa soziedadi de Contivecchi, ki possediat is salinas de Machiareddu, e hiat

otteniu su traballu de ndi tirai su sali de is vascas, medas hominis ki prima hiat castiau malamenti is “comunistas scuminigaus”, nemigus de sa Cresia e de su preri, si fiant accunnotaus a pregontai a babbu, ki fiat su presidenti de sa coperativa, de ddus fai traballai a tirai sali.

Babbu no fiat tirriusu, non portada odia a nisciunus, e jei hiat fatt'andai a traballai tottus is ki si ddu pregontant. Sa coperativa d'hiant zerriada de “Santa Brabara”, in onori de sa Santa ki proteggit a Sinnia. Si biri ca, mancai comunistas, s'arrespettu a is Santus non d'hiant perdiu.

Po traballai toccat'a andai finzas a Macchiareddu, prus allargu de su Pont'e sa Scafa, ma a cuss'ora is operaius non teniant vetturas e diaici, donia santa di, is salineris setziant a bicicretta e partiant a cambarada mana concas' a Casteddu. Po accuri su traballu a or'e luscì partiant a su chizi, poita depiant tzacai stradoni po prus de un'ora, cunseberau ca de Sinnia a Macchiareddu toccat'a fai casi trenta kilometrus de bia.

Candu lompiant non nci fiat tempus po si pasiai, ca donia operaiu depiat tirai cuddu tanti de carrucius de sali, poita ca Contivecchi non pagat a jorronadas ma mesurendu su sali ki ndi boganta de is vascas, e po fai torrai is contus e porri pagai tottu is traballantis toccat'a non perdi tempus.

Inias agatant marras, palias e carrucius e tottu di ddis toccat'a arresigai su sali de is vascas ki fiant stetias sinalaras po su traballu de sa coperativa e ddu depiant tragai a carruciu finzas a su logu anca su sali beniat ammuntonau prima de du carrigai in is carrus po ddu spatinaì a is fabbricas.

Is hominis mannus fiant incarrigaus de arresigai su sali de su fundu, poita ca teniant ogu bonu e depiant atturai attentus a no nd'arresigai su gessu e s'atra bruttesa ki si fiat in fundu a is vascas, poita ca is guardianus de Contivecchi fiant sempri controllendu sa faina e candu s'accatanta ca su sali fiat brutu de gessu non ddu fiant scarrigai a su muntoni, e diaici si perdiat tempus e traballu po debaras.

Is piccioccus ki teniant prus forzas depiant tragai is carrucius a muntoni currend'in is morisceddus strintus strintus, atturend'attentus a no nc'arrai a intrus de is vascas ki fiant ancora prenas de acqu'e mari; pustis ki beniat scarrigau su carruciu, toccat'a curri de bell'e nou a fai un'atru carrigu, sempri poita ca sa paga non fiat a oras ma a faina.

Tottu di toccat'a fai una bella fatiga, bistius cun stivalis de gomma, tottus insoraus e fikius in cussu logu ki nci fiat brintai s'umididari finzas a intrus de is ossus. Candu lompiat s'ora de scapai fiant

fariaus che bestias, ma sa ki fiat apena accabada fiat sa jorronada po Contivecchi, poita sa jorronada insoru sighiat cun s'atra ora de biciretta ki ddis toccat'a fai po torrai finzas a Sinnia, e custa borta sa bia fiat casi totu a punt'a susu.

Candu sa cumbricola de is salineris de Sinnia passada in via Roma de Casteddu fiat meri fattu, e a sutt'e is porticus ddoi fiant sezius is casteddaius po pigai su friscu o po si bufai una birriscedda: inzandus is casteddaius cumentzant a isfutti is sinniesus e custus, senz'e si pori frimai poita ca sciant cantu bia depiant ancora pedalai, arrespundiant a rima a is pigaras in giru ki arricciant.

Cumentis Deus bolirit, arribant a domus insoru e podiant finalmenti pasiai, apustis de prus de doxi oras de candu nci fiant bessius. Fiat una grandu fatiga, ma is hominis de Sinnia fiant meda cuntentus poita ca in cussus mesis podiant cuberai calincunu soddu ki ddus ajurada a nci passai s'ieru. S'un prus de is salineris fiant messaius ki traballendi is terrixeddas insorus fiant justu justu su pani po pesai sa famiglia, boghendi' ndi calancun'ota finzas unu paghedd'e pezza, (po Pasca Manna e Paschisedda) ma jai sempri fiat manestu de fai o piseddu. Sa paga de sa cooperativa duncas fiat grandu cosa in cuss'ora, e prus e prus poita cun cussu traballu is operaius teniant pagaras is marchettas a sa "Providenza", e medas de issus funt arrenescius a teni sa pensioni, a sa beccesa, po mor'e is contributus de sa Cooperativa.

Is hominis de Sinnia abetanta cun prexiu ki fessit arribau capudanni po bogai sali a Macchiareddu e fiant medas cussus ki, finzas senz'e bidea crara, hiant pigau sa tessera de su partidu comunista, de manera ki nisciunus nce ddis fessit passau a innantis a s'ora de zerriai is salineris. Diaici in Sinnia nci fiant medas "cumpangius", e un'orta fiant arrenescius finzas a binciri is elezionis e a sezzi in su cumunu unu podestari comunista.

In cuss'ora deu fia ancora piticheddu, mi regordu pagus cosas, cument'e unu bisu. Mi regordu sa cambarada de is salineris ki torranta su meri pedalendi prus de Coppi, ca teniant pressi de lompiri a domu insoru: candu sa squadra lompiat innatis de domu de unu de issus custu si frimat e saludat is atterus ki d'arrespundiant alligrus: a innantis de su Ponti si frimat tziu Tanieli, in sa Panghisedda si frimat ziu Giuanni e strissiada po sa ia de domu sua tziu Peppinu, concas a Bobboi'Olla tirat Tziu Jesuei e, tra is urtimus, finzas babbu miu arribat a domu. Doniat borta deu d'abetau in sa bia, e inzandus issu mi setziat in sa canna de sa biciretta e mi nci tragat diaici finzas a intrus de domu.

Mi regòrdu ca in domu mia nci fiat un apposentu or'ore bia, ki mamma mia hiat'essi bofiu usai cument'e apposentu bonu, ma babbu dd'hiat usau comente oficiu de sa cooperativa, nc'hiat postu una mesa, unas'cantu cariras e ingunis arricciat is operaius, e faiat is contus de su traballu e de su dinai ki intràrat e ki bessiat.

Mi regòrdu ca calanc'una borta is operaius traganta a domu'nsoru sali appedrisceddau, de cussu ki non arrenesciant a sciasciai de pressi po du tragai a su muntone; fiant pedras ki pesant finzas noi o descu kilus, e issus ddas ponianta in su portapaccus de sa bicicletta e nce ddas traganta a bidde; babbu miu puru, a bortas nd'hiat portau a domu, e inzandus cumentzàt su spassiu po mei: mi donant unu matteddu e deppia sculai su sali, torrendiddu a pedrisceddas cumente cussas ki comporamus in is pakittus; apustis ddu deppia arregoli e donai a mamma ki ddu imperat po coscinai. Cussas sunt is pedras de sali ki mi seu regordau ariser'e notti.

Mi seu regordau finzas s'accabàra de sa cooperativa de santa Brabara.

Sa storia fiat andàra innantis po medas annus, cun prescius, trumentus e faina meda de fai, finzas a candu, in su 1960 mi parit, s'annara non fiat stetia meda bona, e in is vascas de Contivecchi su sali ki fiat abarrau dopo s'istari fiat pagu meda, e amesturau cun atras sustanzias ki non serbiant a nudda; is salineris ddi zerriant "gessu", ma non fiat bonu mancu po cussu: fiat feti unu strobu po is operaius, ca po fai sali toccat a tirai meda prus pruini, e sa jorronada non nci bessiat.

Candu is guardianus de Contivecchi hiant mesurau su sali tirau de sa cooperativa in sa prima cira, hiant pagau sa misura justa justa, ma su tanti arricciu non bastat po pagai is jorronadas de is salineris.

Babbu non hiat bofiu lassai senz'e paga is operaius e, sigumenti dinai no ndi teniat mancu issu, hiat pregontau prestidu in bidde, siguru ca sa cira infattu hiant'essiri poziu arranjai is contus tirendi prus sali de is vascas.

Finzas sa cira infattu peròu ddoi fiant vascas malas, cun pagu sali, e sa paga de Contivecchi fiat stetia prus pagu de su tanti ki toccat a donai a is operaius; babbu hiat circau atru dinai a prestidu e hiat pagau de nou sa cira completa a is salineris.

Sa terza cira sa storia si fiat arripitia uguali uguali, e dopu essiri cicau su dinai po pagai ancora is operaius babbu hiat scullau sa cooperativa.

A issu fiat abarrau su dèpiru, ki ass'ora fiat meda prus de cantu issu hiat'essiri poziu pagai cun discansu; cun grandu trumentu arrenesciat a pagai is interessus e diaici dinai in domu no nci'ndi fiat mai. Po tant'annus heus scrosciolau su tanti de bivi strintu strintu, finzas a candu fraris mius manus hant cumentzau a traballai e hant potziu pagai is depirus.

Est una storia lèggia, poita ca is cumpangius ki fiant prontus a praziri su traballu cun babbu miu in s'ora ki is cosas andanta beni, si funt fuius candu nc'hiarèssit steti prus bisongiu de abarrau unius, e hant lassau un'homini solu a pagai po su discansu de tottus.

A mei abàrrat su regòrdu de tantis sacrificizius, ma finzas su regòrdu de un'homini ki hat tentu su coru de pagai a solu sa fidelidadi a s'idea sua.

Bruno Pilleri de Sinnia.

Bruno Pilleri

Nato a Sinnai il 23/07/54

Residente a Sinnai (09048), in via E. De Filippo, 8

Telefono: 070/767964

Indirizzo e-mail: Bruno.Pilleri@corteconti.it